

三七一、梨耆彌七子品

如是我聞。一時佛在舍衛國祇樹給孤獨園。爾時波斯匿王。有一大臣。名梨耆彌。家居大富。生七男兒。為其娶妻。已至于六。殘第七子。當為求婦。自思惟言。吾年衰邁。唯餘一兒。為之納婦。要令殊勝。時此長者。有一親厚婆羅門。來共相見。因議語曰。今我欲為小兒求婚。未能知處。卿自昔來。遊行諸國。今欲煩君。為我推覓。若見有女。端政賢智。性命相宜。適我子意。乃當求之。時婆羅門。即便然可。遍行看覓。到特叉尸利國。見有五百童女。羣行遊戲。採取好花。用作拂飾。此婆羅門。隨逐觀之。轉復前行。當度少水。諸女子輩。皆脫革屣。中有一女。而獨不脫。并屣入水。轉復前行。續更有河眾女。裹衣。爾乃入水。唯此一女。獨并衣入。前行林間。諸女各各上樹採花。時此一女。自不上樹。從他索之。得花甚多。時婆羅門。問此女言。我有少疑。欲得相問。其女答曰。有疑便問。婆羅門言。向者諸女。當入水時。盡脫革屣。汝獨不脫。有何意故。時女答言。汝癡何甚。所以作屣。正用護腳。陸地之事。眼有所見。

荊棘瓦石。可得避之。水底隱匿。眼所不睹。儻有棘刺及諸毒虫。傷害人腳。是以不脫。時婆羅門復更問言。以何事故。并衣入水。時女答言。女人之身。相有好惡。褰衣入水。為人所見。相好則可。不好嗤笑。以是事故。而不褰之。時婆羅門復更問言。以何緣故。獨不上樹。女便答言。若當上樹。樹枝儻所。危害人身。以是事故。而不上耳。此女即是波斯匿王弟。曇摩訶羨女也。羨昔因罪逃奔彼國。便於其土。安家納娶。而生斯女。字毘舍利。時婆羅門聞女所說。知必賢能。而問女言。汝父母在不。女答曰。在。遂逐到門。求共相見。女入白父。外有婆羅門。欲見大人。時曇摩訶羨便出見之。問訊已竟。而語之言。向者女子。是君女不。答言。是也。為有主未。答言。未也。婆羅門言。舍衛國中。有一大臣。字梨耆彌。君識之不。答言。舊識。婆羅門言。是梨耆彌。最下小兒。端政聰明。欲求君女。共為婚姻。可得爾不。曇摩訶羨言。彼是豪姓。本與匹偶。苟其欲得。情在無違。已蒙許可。便共剋日。爾時有伴。往舍衛國。時婆羅門。即作書疏。與梨耆彌。陳說事狀。長者聞已。辦具娉物。車馬騎乘。往特叉尸利國。漸近欲到。先遣使往。時曇摩訶羨善加敬待。即設賓會。以女娉之。諸事畢竟。當還舍衛。時此女母。於眾

人前。囑其女言。自今已後。常著好衣。恒食美食。日照鏡。莫令斷絕。女即長跪。奉受教。梨耆彌聞。陰用為恨。人生一世。苦樂無定。好衣美食。如何得常。恒照明鏡。斯亦非理。雖有此念。難不問之。客主相辭。於是別去。大小徒侶。進路歸國。於道中間。有一客舍。四面垂軒。極為清涼。其先到者在。下休息。兒婦後至。啟白。公言。此不可住。速出向外。公不違之。出向露處。左右數人。不肯出去。時有象馬。身體瘙癢。以身揩柱。屋即崩壞。填殺下人。時梨耆彌作是念言。我今脫死。由是兒婦敬遇之心。倍益隆厚。即便駕乘。進路而歸。到一大澗。草茂水美。眾人息駕。澗側而住。兒婦後到。便語之言。住此不快。速出岸上。即用其言。遠澗休息。須臾之間。便有雲起。震雷降雨。滂沛而下。溢澗流來。時梨耆彌。復重念曰。吾等今日。再脫於死。由此兒婦。得全身命。復救嚴駕。涉道進前。既達本國。中表親里。悉來慶問。長者欣悅。即設供具。共相娛樂。終竟一日。賓客既罷。是時長者。召諸兒婦。而告之曰。吾今年高。厭眾事務。家居器物。欲有付託。卿等諸人。誰能為我。知藏執鑰。六大兒婦。盡辭不堪。其第七者。自言能任。于時長者。以諸藏鑰。悉以付之。既以受命。勤謹不懈。朝朝早起。灑掃堂舍。炊蒸

已竟。先飯媼姑及諸男女。後飯奴婢僮僕。使人各各分處赴趣作業。然後自食。以是為常。媼見忠恪不與凡同。怪前母囑而不用之。便問之曰。汝前來時。被母教敕。好衣美食。日照明鏡。其事云何。卿可說之。兒婦長跪。具答事狀。我母所約。著好衣者。體上大衣。教使愛護。恒令淨潔。時間客會。可得鮮妙。所敕美食。非為甘肥。教使晚飯飢虛得食。麤細盡美。其明鏡者。非銅鐵鏡。教今早起灑掃內外。端整床席。務令淨潔。我母所囑。其事如是。時媼聞之。知有妙才。情存待遇。甚倍於前。家中眾物。悉以委之。歡喜泰然。無復憂慮。時有羣鴈。飛入海渚。食噉粳米。食之既飽。銜稊トウ翔來。當王宮上。失墮殿前。諸人見之。取用奉王。王見奇好。必中作藥。敕使留種。莫得棄散。賦與諸臣。各令殖之時。梨者彌亦得少許。持至於家。教令種之。兒婦奉取。驅率奴僕。調和畦田。於中下種。生長滋茂。大獲子實。諸人種者。消息失度。悉皆不生。時王夫人。欸得篤疾。召問諸醫。治病所由。中有醫言。當須海渚粳米。作食食之。爾乃可差。王自憶念。昔得其種。賦人懇殖。今當推校。為有為無。即召諸臣。而問之言。前敕種稻。為成熟不。今日急須用治。困病諸臣。各各自說本末。或云不生。或云鼠噉。時梨耆彌。

歸家問曰前種稻米。為獲實不。欲得與王治夫人病。兒婦答言。家內豐多。若用作藥。足周一國不齊一人也。時梨耆彌。即送與王。尋用作食。以與夫人。夫人食已病得除愈。王甚歡喜。大與賞賜。時特叉尸利舍衛二國。共相嫌隙。常不和順。時特叉尸利王。欲試舍衛有聖智不。遣一使者至舍衛國送牝馬二匹。而是母子形狀毛色。一類無異。能別識者實為大善。王及羣臣。不能分別。時梨耆彌。從宮歸家。兒婦問言。有何消息。妘即答言。如向所見。兒婦白言。此事易知。何足為憂。但取好草。並頭而與。其是母者。推草與之。其是子者。拽搏食之。時梨耆彌尋往白王。王如其語。以草試之。果如其策。母子區別。即語使者。斯是馬母。彼是其駒。時使答言。審如來語。無有差錯。王大歡喜。倍加爵賞。時彼來使。還歸本國。具白諸理。時特叉尸利王。便更遣使。送於二蛇。麤細長短相似如一。能別雄雌者。斯亦大善。波斯匿王及諸羣臣。無能識者。時梨耆彌。歸問兒婦。此復云何。兒婦答言。以一端細毳。數置於地。取此二蛇。用著毳上。若是雌者。靜然不動。其是雄者。搔擾不寧。何以知之。女之為性。愛著細滑。得軟生染。不欲動搖。男子性剛。轉側不安。以此推之。可足知矣。長者聞已。即往白

王。王從其計。尋時試之。果如所言。了了識別。告彼使曰。是雄是雌。使尋報曰。審爾不虛。王甚慶悅。大賜財寶。時彼國王復送一木。長滿一丈。根杪正等。無有節目。刀斧之跡。而語之曰。若能識別此木上下。亦大快善。甚不可量。王及諸臣。無能識者。時梨耆彌復問兒婦。兒婦答曰。此事易耳。但取其木。用著水中。根自沈沒。頭浮在上。長者聞已。復往白王。王用其語。而便試之。果如其計。沈浮各殊。語彼使言。浮者是頭。沈處是根。時使答言。信如所論。王益歡喜。重與賞賜。彼使還國。具白因緣。其王聞之。心用信伏。更遣使命。兼獻珍寶。因復語曰。大王國中。實有賢達。自今以後。當修義好。波斯匿王。情倍踊躍。召梨耆彌。而問之曰。頃來諸事。卿何由知。梨耆彌言。非臣所達。是臣兒婦之智辯耳。國王聞已。深加欣敬。拜其兒婦。用為王妹。復經少時。兒婦懷妊。日月已滿。生三十二卵。其一卵中。出一男兒。形體顏貌。端嚴挺特。年遂長大。勇健無雙。一人之力。敵於千夫。父母愛念。合國敬畏。後為納娶。各已備畢。純是國中豪賢之女。時毘舍離。信心開解。請佛及僧。於舍供養。佛為說法。合家眷屬。得須陀洹。唯末小兒。未獲道迹。時乘白象。欲出遊戲。門外有塹。既深且廣。於其塹上。有大

木橋時此年少。適到橋岩爾時復有輔相之子乘車外來。橋中相逢。各恃豪姓。不相開避。毘舍離兒便懷瞋恚。就於象上低身下向。捉輔相子并其車乘。擲置塹中。身體傷破。百節皆痛。啼哭而歸。白其父言。毘舍離兒橫見毀辱。傷我身體。苦痛若斯。其父聞之。甚用懊惱。恤其子言。彼人力壯。又是國親。難與爭勝。當思密計以報此怨。即以七寶合為馬鞭三十二枚。用好純剛。作刀內中三十二人。各遺一枚。而語之言。汝等年少。體性自嬉。故作此鞭。而用相贈。幸可納之。恒捉在手。諸人歡慶。便為受之。是時國法。見王之時。禮不帶刀。於是輔相已見納受。而常秉執。便向國王深潛讒之。云毘舍離三十二子。年盛力壯。一人敵千。今懷異計。謀欲害王。王雖聞之。情猶未信。復更白王。事審不虛。現有證驗。各作利刀。置馬鞭中。以此推之。事足明矣。王即索看。果如所言。王意便信。謂必為然。選擇力士。安在宮內。一一召喚。於裏殺之。以三十二頭。盛著一函。繫縛封印。送與其妹。當於是日。其毘舍離。請佛及僧。就家供養。見王送函。謂為致供。來相助辦。便欲開看。世尊告曰。且住。勿解。須待食竟。食飽已訖。便命令坐。為其說法。此身無常。苦空無我。生多危懼。不得久立。眾惱纏縛。辛

酸難計。恩愛別離。互相悲戀。唐因身識。於道無益。唯有智者。能解此惡。時毘舍離。霍然情悟。得阿那含道。歡喜合掌。白世尊言。唯垂矜愍。見賜四願。一者諸病比丘。給足湯藥。隨病飲食。二者看病比丘。亦給其食。三者遠來比丘。先供養之。四者遠行比丘。給辦糧餉。所以者何。諸病比丘。由無湯藥。好飲食故。其病難差。或復沒命。瞻病比丘。由無食故。當捨乞食。早晚無時。病人所須。或能差錯。違心恚怒。病則難愈。以是之故。當施其食。諸有他方遠來比丘。初到異土。未有知識。若行乞食。或值惡狗。或逢弊人。儻能瞋恚。傷損毀辱。以是之故。當先與食。遠去比丘。當須伴侶。由無糧餉。或不逮伴。道路遐險。多諸毒獸。設當獨涉。或致危難。我以是故。當供給之。爾時世尊。聞毘舍離求此四願。讚言。善哉善哉。如汝所願。其德弘大。供佛無異。即與眾僧。還到祇桓。世尊去後。開函視之。三十二頭。悉在函中。由愛斷故。不生懊惱。但作是言。痛哉悲哉。人生有死。不得長久。驅馳五道。何若乃爾。三十二兒。婦家親族。聞此事理。極懷瞋恚。咸共唱言。大王無道。枉殺善人。共合兵馬。欲為報仇。軍眾雲集。圍繞王宮。時王恐怖。退向佛所。諸人聞之。即引軍馬。往圍祇桓。爾時阿難。聞波斯匿王殺

毘舍離三十二子。婦家宗黨。欲為報仇。長跪合掌。白世尊言。有何因緣。三十二兒。為王所殺。世尊告曰。毘舍離子。三十二人。不但今日為王所殺。三十二人一時頓死。汝今善聽。持之在心。當為汝說。阿難曰。諾。佛告阿難。乃往過去久遠世時。此三十二人。共為親友。相與言議。盜他一牛。彼時國中。有一老母。無有子息。單窮困厄。時諸偷兒。往詣其舍。欲共殺牛。老母歡喜。為辦薪水。煮熟之具。臨下刀時。牛跪勾命。諸人意盛。必欲殺之。牛便結誓。汝今殺我。將來之世。我不置汝。正使得道。猶不相放。立誓已竟。便為所殺。諸人燒煮。競共噉之。老母因次。亦得飽滿。欣悅而言。由來安客。今日最善。佛告阿難。爾時牛者。今波斯匿王是。爾時盜牛人者。今毘舍離三十二子是。爾時老母者。今毘舍離是。由此果報。五百世中。常為所殺。乃至於今。彼時老母。由助喜故。五百世中。常為作母。極懷懊惱。今值我時。始獲道證。阿難合掌。重白佛言。復修何福。豪富猛健。佛告阿難。乃往過去迦葉佛時。有一老母。信敬三寶。其家大富。合集眾香。以油和之。欲往塗塔。於其中路。逢三十二人。因而勸之。我欲以油塗塔。可相助佐。當得福德。世所生。端正多力。時三十二人。歡喜共去。塗塔已竟。各

作是言。由是老母故。令我等得種福業。願所生處。尊榮富貴。恒為我母。我等為子。常莫相離。見佛聞法。疾得道果。老母喜悅。便許可之。從是已來。五百世中。恒生尊貴。爾時老母。今毘舍離是。爾時三十二人。今三十二子是。時諸軍眾。聞佛所說。恚心便息。而作是言。大王所刑。非適為之。此人自種。今受其報。由殺一牛。猶尚如是。波斯匿王。是我曹主。云何懷惡。而欲危害。即除器仗。自投王前。求哀請過。王亦釋然。不問其罪。爾時世尊。因為四眾。廣說諸法。善業應修。惡行應離。敷演分別四諦妙法。眾會聞者。皆得道證。受持佛教。歡喜奉行。

三二八、設頭羅健寧品

如是我聞。一時佛在羅閱祇竹園中。爾時賢者阿難。從座而起。整衣服。長跪叉手。前白佛言。阿若憍陳如。伴黨五人。宿有何慶。依何因緣。如來出世。法鼓初震。獨先得聞。甘露法味。特先得嘗。唯願垂哀。具為解說。於時世尊。告阿難言。此五人者。先世之時。先食我肉。致得安隱。是故今日。先得法食。用致解脫。爾時阿難。重白佛言。先世食肉。有何因緣。願具